

Menangis kenang kemiskinan

PM kesal sikap cerdik pandai

PEKAN, Sabtu — Datuk Seri Dr Mahathir Mohamad hari ini menyesali sikap golongan cerdik pandai yang cuma 'menangis' mengenang kemiskinan kaum nelayan, tetapi tidak berbuat sesuatu memperbaiki kehidupan mereka.

Menurutnya, golongan itu cuba memperkecil-kecilkan usaha kerajaan membantu kaum nelayan dan sanggup menandatangani supaya Lembaga Kemajuan Ikan Malaysia (LKIM) dibubarkan.

"Kini kita harus tanya cerdik pandai itu, apakah sebenarnya salah LKIM hingga ia mesti dibubarkan?"

"Kalau kita hendak bubarkan LKIM, lebih baik kita hapuskan juga kerajaan menangkap ikan," katanya di pelancaran kawasan pembangunan nelayan di Kuala Pahang dekat sini hari ini.

Nasib

Perdana Menteri bertanya, apakah kemiskinan dapat dibasmi jika negara ini tidak mempunyai nelayan?

Beliau memberitahu kaum nelayan, nasib mereka sentiasa mendapat perhatian bukan saja kerajaan, malah cerdik pandai hingga mereka menghasilkan buku mengenai kepedihan dan kemiskinan kaum nelayan.

"Malangnya, ada juga antara cerdik pandai itu cuba membangkitkan semangat bencikan kerajaan, kononnya kerajaan tidak berbuat apa-apa untuk mengatasi masalah nelayan.

"Kita tahu ramai bijak pandai menangis melihat penderitaan kaum nelayan, tetapi mereka tidak berbuat apa-apa untuk membantu nelayan meningkatkan pendapatan," jelasnya.

"Golongan itu mula menyalahkan bermacam-macam badan dan kerajaan, termasuk menandatangani supaya LKIM

dibubarkan," ujarnya.

Perdana Menteri yang mengadakan lawatan dua hari ke negeri ini sejak semalam berkata, inilah kali pertama beliau ke kampung nelayan di negeri ini dan sungguh bersimpati dengan nasib nelayan.

Turut hadir ialah Datuk Paduka Dr Siti Hasmah, Menteri Besar, Datuk Haji Mohd. Najib Tun Abdul Razak, Menteri di Jabatan Perdana Menteri Datuk Khalil Yaakub dan Timbalan Menteri Pertanian, Datuk Dr Goh Cheng Teik.

Datuk Seri Dr Mahathir berkata nelayan boleh mengatasi masalah laut gelora di musim tengkujuh jika mereka menggunakan bot-bot be-

sar seperti yang disarankan oleh kerajaan sejak sekian lama.

Dengan menggunakan bot-bot besar mereka juga boleh berada lebih lama di laut dan menangkap ikan jauh dari pantai.

Perdana Menteri mahu para nelayan mengikis sikap yang menghalang kemajuan seperti tidak bersedia meninggalkan rumah lebih lama dan merayu mereka menerima perubahan yang diusahakan oleh kerajaan.

Tetapi jika mereka tidak sanggup menerima perubahan ini, mereka tidak harus cemburu kalau nelayan-nelayan lain menikmati pendapatan lebih tinggi daripada hasil usaha mereka.